

秦蜀驛程後記

ChL 9117-1148

77

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

OCT 11 1982



秦蜀驛程後記卷上

經筵講官戶部左侍郎王士禛

康熙三十四年十二月十七日乙巳 詔赦天下

遣廷臣祭告長白山五嶽四瀆及歷代帝王陵寢

孔子闕里三十五年正月二十一日戊寅 命宗

人府丞劉元慧往長白山內閣學士兼禮部侍郎

張榕端泰山 經筵講官戶部左侍郎王士禛華

山刑部左侍郎田雯嵩山工部右侍郎李枏衡山

都察院左副都御史嚴曾架恒山同遣者十六人

已而以翰林侍讀學士李鎧期服喪改 命僉都

哈佛大學漢和
圖書館珍藏印

御史常翼聖二十七日甲申

上御保和殿親

閱祝文香帛禮部尚書侍郎等官執事奉使諸臣
皆在列閱畢由太和門馳道出諸臣于午門辭朝
行三跪九叩頭禮畢隨至禮部頒祝文香帛士禛
以康熙十一年壬子奉 命典四川鄉試二十三
年甲子奉 命廣東祭告南海至是丙子又奉
命陝西四川祭告西嶽西鎮江瀆歲皆在子

二月初三日己丑發京師大風寒夜抵良鄉縣

少詹事兼侍講學士李山公錄奉使南海太

僕少卿宗姪公垂紳奉使湖南亦至行六十

里

初四日山公公垂見過早發予候家人留不

知縣傅君作來夔州人言夏秋江漲自成

水行十日可抵江陵

初五日風寒宗人侍講學士子武九使直隸至

云已至昌平祭天壽諸陵畢將往易州

初六日晴風止常僉都百子翼以同使關中至

得京師幔亭士弟及長兒涑家書知兒訪以

二月朔日自德州北來

初七日晴與常中丞同發過琉璃河或云劉抵涿

州訪劉司業鍾山芳留與中丞同飯晚鍾山復來十年前成均舊僚也家人不至行七十里

初八日晴鍾山見過移晷別去兒訪姪深至山遺新雕楚詞兒凍寄傳燈錄與訪輩夜分乃寢

初九日晴訪往京師作家書深從行抵定興范石湖云舊黃村金始建縣行七十里

初十日晴無風十里涉白河過白河店拜墓愍公祠墓在河北二里食固城鎮社

異越居也康熙己未君異與太原傅青主

同徵至京師以老病辭 優詔並授中書舍

人放歸趙玉峰麟少宰告予曰語云過則勿

憚改君異則無過可改楊庸菴瀚太僕曰杜

先生居新安吾見其無日不樂抵安肅縣縣

北有瀑河宋靜戎軍也石湖云舊梁門三城

今惟一城塘灤皆涸蓋宋遼分界行七十里

十一日晴再渡瀑河午抵保定府治清苑縣一

畝雞距二泉夾郡城合流南入滏水入城弔

門人陳藹公信謁忠愍公祠睹畫像豐而髯

後室並祀徐文貞望湖階王司馬繼津遊王

司寇弇州貞世及吳明卿國倫徐子與中諸賢下

及獄吏某某皆嘗周旋先生患難者皆下跪

鐵鑄相嵩等五軀皆面縛其一已斷脰者嵩

也清苑人高鑄字淵穎博學工書好遊名山

題名賦咏輒手自鐫刻著蘆中集漁村清話

藹公師事之年家子劉宗燦返京師附家書

行五十里

十二日晴風氣暄暖食陘陽驛抵慶都縣城中

東南隅有堯母陵東郭有帝堯廟廟中古植

二株東者同根三幹西者同根五幹俗謂三

皇五帝栢有元翰林侍讀學士郝經撰碑行

九十里

十三日微陰午晴過清風店抵定州謁韓忠獻

蘇文忠二公祠祠為衆春園舊址叔黨常通

判中山今配享蘇祠次至閱古堂堂在州署

後圃萬曆間知州宋子質別建續閱古堂于

署東偏今所觀者是也雪浪石在州學作亭

覆之墨莊漫錄云東坡帥中山得石黑質白

章如孫知微所畫石間奔流盡水之變作白

石大盆盛之激水其上名其室曰雪浪齋有
 銘云予審視盆四面刻紋作芙蓉脣上週
 遭即公手書銘惜不及摹搨旁一碑刻石圖
 下方雪浪齋三大字亦公書然石實無他奇
 徒以見賞坡公侈美千載物亦有天幸焉或
 曰坡平生愛奇石常取文登彈子渦石以詩
 遺垂慈堂老人得齊安江石作怪石供以遺
 佛印又從程德孺得仇池石以高麗大銅盆
 盛之湖口李正臣蓄異石九峰玲瓏坡欲以
 百金置之名之曰壺中九華賦詩云念我仇

池太孤絕百金歸買小玲瓏又有石芝沈香

石右見霏雪錄集中別有醉道士石怪石石斛詩要

皆以坡傳耳以雪浪例之未必奇也石非為

仰蘇亭又天寧寺壁舊有叔黨楷書云大帥

陳公邀廉訪梁公飯于天寧率其屬游企盛

侖蘇過王執中趙奇韓楫同來孫仲舉王昭

明劉用之皆與癸卯九月七日過題城中有

唐諫議大夫楊城墓晚得吳天章震蒲州書

行六十里

十四日晴次新樂縣予壬子歲過此題詩驛壁

寄宋荔裳

琬

蜀臬云當年霧夕咏芙蓉促席

傳觴樂未踈名黍應劉七才子座傾沈范兩

尚書飛星過漢無留影萍葉隨潮少定居賴

有前期不相負秋來同釣錦江魚沈范謂龔

宗伯芝麓

鼎

梁相國蒼巖

清

標也時荔裳與予

先後入蜀其明年荔裳入覲卒京師龔公即

以是歲下世戊辰梁公以司馬入相辛未卒

于位今復過此舊館已頽前題不復可見俛

仰二十五年間遂如隔世益知維摩談空理

不可易也新樂南涉派河其水五派分流如

琴弦又曰琴川得張寶菴

璽

新野書抵伏

驛行九十里

十五日晴次真定府治真定縣憇龍興寺登大

悲閣觀大像像高七丈有奇相好莊嚴宋開

寶二年範銅為之初周顯德中像毀藝祖伐

太原過之命復其故會寺圃有光望氣者占

之得銅亡算復暴雨滹沱漲大木萬計自五

臺浮河而至像遂以成見宋人葛蘩記閣西

有藝祖畫像又有宋鎮國軍節度使特進檢

校太尉權知鎮州軍府事錢惟治織成連環

秦蜀後記上
詩九十首拜故相國梁公祠訪臨濟寺義玄
禪師道場荒落無一僧今臨濟兒孫徧天下
而祖庭頽廢至此將時節因緣亦有待耶宋
證悟法師有題僧募馬祖殿瓦偈曰寄語江
西老古錐從教日炙與風吹兒孫不是無料
理要見冰消瓦解時偶憶此因題諸壁涉滹
沱抵獲鹿縣行九十五里

十六日晴出獲鹿西關清溪環遶羣峰翕集十
里入土門史所稱井陘口也食冶河河發源
平定娘子關姤女祠下次井陘縣贍四山

之均治水遶其三面中流皆置水碓過龍窩
寺懸厓有亭朱闌層松縹緲可愛抵胡桃園
行九十五里

十七日晴過井陘舊關關下有趙秉文懸泉賦
碑次井陘關舊關地狹山卑至今關即絕壁
造天石色如鐵鳥道百折始及關門廣武君
所云井陘之道車不得方軌騎不得成列謂
此也食栢井驛抵山西平定州行一百五里
十八日晴自平定州而西竟日行荒山中山均
積雪人馬踏堅冰行地氣吁可怪異晉人語

謂冷壽陽也食芹泉驛抵壽陽縣縣東方山
成化院唐李長者造華嚴論處行一百里
十九日晴大風食大安驛抵什貼鎮行八十五
里

二十日晴食鳴謙驛抵徐溝縣洞渦水經其縣
南行一百里

二十一日雲而風辰晴渡侯甲水次祁縣訪老
友戴楓仲廷見其子永豐今記知楓仲以壬
申觀化作詩弔之記遺瀨岡阡表云碑石上
有龍爪痕蓋江神借觀故跡又遺傳青土山

畫蘭石一軸自題古篆二十八字縣有東漢
王司徒允墓所謂太原王也抵汾州府平遙
縣五里莊宿縣北十里大興觀有趙閑閑草
書陰符經碑行一百五里

二十二日晴食張蘭鎮抵介休縣縣北五里拜
郭有道祠墓有蔡中郎碑萬曆中郭青螺章

鈞摹重刻又一碑亦仿漢人八分近日金陵
鄭谷口籃書按酈注又有宋子浚碑宋名冲

林宗友也今無考入東關謁宋潞國文忠烈
公祠祠乏專祀榱桷漸頽惟子孫春秋祭焉

漢習隆向充論諸葛公曰丞嘗止於私門廟
祀闕而莫立亦可慨已行八十五里

二十三日晴過泠泉關關為太原平陽要害嘉
靖萬曆間再修之今廢無居人次索洲鎮六
十里始蓐食抵靈石縣北一里小水鎮舊有
唐永徽公主手痕碑行八十里

二十四日陰過韓侯嶺謁祠碑版甚夥然多仆
舊碑立近人碑祠壁題咏自常評事倫外又
得王御史傳王知府濬楊太保魏三詩皆佳
食仁義驛抵霍州州東二里有隋忠臣宋老

生祠墓行一百里

二十五日晴霍州南郭望見霍太山次趙城縣
自霍州南柳已黃綠杏花盛開視并汾間寒
燠頓異抵洪洞縣洪洞山水人物冠于河東
乙亥四月地震公私廬舍多圯假宿北關弘
濟寺遍聞禪人方丈行八十里

二十六日晴謁臯陶廟抵平陽府臨汾縣治宿
北關平陽地震之變郡城尤甚次襄陵洪洞
浮山三邑賴 上發帑金二十萬城垣廟
學官解民居以次修治尚未及什二也陶唐

氏陵在郡東七十里俗謂神林今告祭乃在
充東平未詳也又有丹淵侯祠墓丹朱也或
云在慶都非是故人子侯稷山文燦來致予合
集侯刻之梁溪者行六十里

二十七日大風食趙曲鎮抵高縣鎮曲沃縣境

縣今述故相衛文清公周祚清節按勝國泊

本朝謚文清者二人皆河東產如公者不愧
敬軒矣公子台瑞字凡夫子門人也今知鄭
陽府行一百里

二十八日大風晝晦食侯馬驛抵聞喜縣縣有

唐玄宗御書裴光庭碑城東北鳳凰原裴氏
世葬于此凡百餘家先太師公萬曆初知此
縣至今百餘年有桐鄉之思聞喜漢之左
邑桐鄉也聞予至

諸生父老年七十以上者數十人率子弟迎

十里外至舍館予延坐一一慰勞之父老具

言公恩德自其祖父以來沒齒不忘迄今婦

人女子皆能道公氏籍縣故有公與孟津大

司寇喬公允升合祠又有專祠在城東門予壬

子過此謁祠知縣沈君光瑀重葺之父老又言

康熙二十六年祁縣戴楓仲廷棧為學博以舊

祠地湫隘與士大夫父老議僉同改建新祠
東城之內尸而祝之桐人古道至矣會暮不
及謁祠行一百十里

二十九日入東門謁祠下諸生父老皆從食水
頭鎮抵牛犢村宿猗氏縣境衛中丞爾錫既齊
待予于此衛舊官吾鄉方伯擢京兆尹御史
中丞出撫貴州今罷官家居話更餘別去猗
氏至今多令狐氏行一百十里

三十日晴食樊橋驛抵蒲州州頑民阻中條山
為亂會鎮道皆有出塞之役乘間竊發而解

州河津夏縣等亂民亦聚眾屯結遙相倡和
按蒲州古河中府又為中都襟山帶河在唐
宋為重鎮介平陽西安之間相距各數百里
自明降為州頗失控馭之勢若復河中府治
之舊割平陽南鄙州縣之半隸之則秦晉間
如臂指之聯絡矣常中丞亦至行一百十里

三月初一日丁巳晴與常百子中丞同行食陞

河即首陽之下山上有夷齊廟自風陵追渡

黃河抵潼關陝西境同年楊臨淄樹滋端本潼

人也作關志有兵略一卷述古今攻守得失

之故甚具其言曰入關有三道潼入關之正道也商武關入關之孔道也漢祖破秦由此入咸陽朝邑古臨晉地自夏陽至關平曠百里大河易渡漢祖往來關中嘗由臨晉七國反亦欲兵由此入入關之際道也韓五泉邦曰靖曰一方不靖三險俱失誠哉是言然武關萬山險阻一將偏師可以無虞朝邑雖平曠百里命將建營壘于中路設礮數十南北巡守大河即天塹也若潼關之守則禁溝在關城南三十里一曰禁谷亦曰禁坑最為要地昔黃巢從禁坑陷關近李自成

中水川關誌

亦由禁坑破關非一方不戒三險俱失之明驗與此設險者所當知故備錄之行七十里

初二日晴謁關西夫子墓墓左右七冢今惟四冢昭穆列墓前故有祠湯尚書荆峴斌備兵

潼關時重修之自為記文甚雅馴距今四十年已廢為瓦礫午次西嶽廟齋宿行五十里

初三日晴昧爽詣白帝宮即奠陪祭官西安府潼關同知周志煥華陰縣知縣董盛禮畢登萬

壽閣前有御碑亭三十三年命皇長子祭西嶽之神因建諸碑刻近古者後周口口

年一碑唐魯國顏忠烈公題名

即刻後周碑之側

宋人

題名碑碑凡八面青牛老樹亦奇古歸寓館

食畢趨嶽下過訪宗人山史

弘

山居潔樸無

纖塵聯額皆孫鍾元

奇

鄭谷口

籃

李大生

因

諸名士書後為讀易廬鍾元題曰待菴戊申

歲山史在京師屬賦獨鶴亭詩今不可至矣

五里憇雲臺觀一里至谷口即入山道玉泉

院在溪西有希夷洞洞旁巨石刻山蓀亭三

大字希夷嘗作亭于此玉泉水環之石旁有

斜四扶踈可愛或曰無憂樹也十里至娑羅

坪有娑羅樹一坪之下為希夷峽坪之上為

白鹿龕毛女洞凌虛臺行盤路十里至青柯

坪坪直西峰下澗道深廣飛梁跨其上注謂

山雨滂湃洪洋泛灑挂溜騰虛直瀉山下當

不減廬山開先棲賢之奇惜久旱石竇皆伏

流涓滴耳自坪望南峰東峰皆不見晡下山

抵嶽廟寓館吳天章至自朝邑

初四日晴食敷水鎮敷水出羅敷谷谷受秦嶺

以北諸水樂天詩上得籃輿未能去春風敷

水店門前過臺頭訪楊同年樹滋

端

故居樹

滋昔今臨淄年四十罷官卜築著書于此一
軒三室自題曰羲皇以上懷葛之民軒前海
棠紫荆方盛開真隱者之藹軸也謁紀公祠
祠祀漢紀信觀于東溪溪上有沁園荷塘稻
塍茂林修竹渺然如江湖之上郭孝廉眉伯
宗別墅也今歸劉氏抵華州東關謁唐汾陽
昌郭忠武王祠有宋皇祐中王彰碑明秦王賓
竹道人詩碣長歌頗遒勁有氣宿西關刑部
尚書圖紀公自寧夏犒師至行七十里

初五日夜聞雨聲甚喜晨發輕陰雨止路無風

埃過西溪溪上有鄭縣亭子張氏西溪草堂
皆廢次赤水鎮其南有晉周孝侯祠元康中
處討叛羗齊萬年戰歿于此邦人祀之然謂
赤水為斬蛟處傅會無理注云小赤水即山
海經之灌水也食渭南縣東關東南一里豐
原有唐河西隴右節度使王忠嗣墓年家子
陳給事子敬世來云歸武林詢宗人岳生承
少司空南遊姑蘇未返遂行抵泠口宿注云
泠水出浮肺非注于渭年家子南毓渥來明
工部尚書二太先生居孫也言白樂天紫蘭

村在渭河北有三冢白氏尚聚族于此行九
十里

初六日陰復晴過新豐有漢留侯舞陽侯祠去
鴻門坂二里抵臨潼縣食罷出華清門浴于
溫泉泉在靈泉觀西非復壬子之舊觀多石
刻今觀圯縣令移貯他所未知存者什幾矣
遂登西繡嶺松毛被山一徑蜿蜒而上至老
君觀殊荒闕唐天寶中以玄元皇帝降朝元
閣改曰降聖老君殿在其南刻白玉為像制
作精絕今亾矣南上為驪山老母祠蓋授李

笙陰符處又南為第一峰上有烽火樓遺址
驪山最高峰也望秦始皇墓東行陟降凡數
折不可以輿乃杖筇達東繡嶺歷文殊臺觀
音菴達磨洞稍憇仰睇捨身厓不至石壁上
有宋轉運使金部郎中李叅絕句書法似柳
誠懸詩不甚工而近雅螺旋上下或入于谷
或陟于巘人皆踏石稜行石壁奔峭詭態百
出無一雷同松毛青蒼纓巘帶阜一折一竒
履危石而下至瀑布巘石理皴皴絕類靈壁
產惜久曠瀑不甚壯沿絕壑又四五折達石

甕寺迴望來徑已在百仞上翠微杳靄略可
髣髴是南宗董巨筆也寺前坐見渭水嶺南
一徑可通藍田自此復御兜子十餘折渡石
梁下三天門抵西峰之趾與來徑合大抵西
嶺多土少石東嶺石骨巉秀不受寸土松檜
皆從石罅迸出過西嶺遠甚而華清諸宮殿
故蹟皆不可指似其處矣是日門人涼州李
郡丞我宜興龔太學勝年家子西安張別駕
晟廣宋商南業及商州守戴君良自西安來迓
先後至行四十里

初七日雨過灞橋夾岍楊柳視昔已減什九賦
一詩志感驛旁有唐河西節度使王君奭墓
再渡澧水眺終南山在雲氣中如隔霧縠抵
西安府治長安咸寧二縣巡撫都御史黨愛
布政使禪布按察使納壘驛傳道僉事程兆
麟迎拜起居如儀入城駐貢院巡撫諸公來
常中丞亦至行五十里

初八日雨晤巡撫黨中丞言吾關內有李夫子
者公知之乎予曰知之是塾屋李顯中孚也
此中故有關中書院為明馮恭定公從講學

處公政暇能聘主講席倡明正學甚盛事也
初九日雨中丞藩臬諸公置酒貢院坐見終南
初十日晴常中丞先行往中部

十一日晴移寓館宋商南來言鄒人李栢字雲
木高士也與李顥齊名今居漢中之洋縣宋
為買田樊川有宅一區水田三十畝將招隱
焉約以明日往遊

十二日晴出永寧門至薦福寺即唐勝容院也
有小鴈塔塔門石楣有明弘正間王雲鳳蔡
天祐段炅安磐王謳等題名書其上左壁有

康乃心題秦莊襄王墓絕句云園廟衣冠此
內藏野花歲歲上陵香邯鄲鼓瑟應如舊嬴
得佳兒畢六王賞咏久之龔節孫勝玉為言康

字太乙邵陽名士長安語曰關中二李不如
一康殿簷下有斷碑止存其額云唐三階大
德禪師碑寺僧行義云唐僧伽宋寂音尊者
皆常居此其師紫谷禪師者名智覺洞宗善
權百愚斯禪師之嗣與盤山拙菴智朴禪師
兄弟也至興善寺寺與元都觀鄰并隋置今
觀廢惟寺存唐惟政禪師居此像設甚古殿

前左右壁畫大士變相羅刹降魔像二軀尤
奇殿後畫淨土蓮池化生亦工萬曆中高君
仕筆也寺有憨休禪師名如乾濟宗雲峨禪
師之嗣能詩今住風穴風穴在汝州沼大師
道場也東南至慈恩寺鞠為茂草惟鴈塔存
不可登矣塔上唐人題名略無髣髴塔下東
西龕置褚河南聖教序啓聖記二碑幸完好
龕中有唐太宰龍題名書仿顏平原塔下禪
人德圓居之紫谷法嗣也寺西即杏園亦廢
南過秦愍王陵又南抵韋曲東為皇子波自

此而南彌望皆稍勝如方罨如儻帔清明渠
水遶之過杏花坪古龍堂登勲蔭坡即牛頭
寺之麓也寺倚杜陵原精藍因山高下踈落
有致有唐乾符六年尊勝陀羅尼幢一明許
中丞少華宗魯書碑一夜坐寺前前對終南太
乙諸峰下俯滴水注云水出杜陵縣亦曰高
杜水也西為神禾原水田棊布蛙聲閣閣月
明皎然煙鳥皆定不知去人世幾由旬矣二
更歸宿方丈有王山史題壁

十二日晴循杜陵東行入子美祠祠以太微山

人張治道配食清明渠水經祠下北流上有
古松一壽藤二本根如龍蚪與松相糾詰曲
蚴蟻極可玩左右皆桃圃桃尚有華因語咸
寧陳令明經當作周垣時其啓閉又東過延安
坡鳳棲原憇丹陽觀沿路皆渠水奔流清駛
桃花萬樹抵杜曲杜曲西南云是牧之故居
有冢在麥田藜棘中即其葬處不可知也自
杜曲而東至夏侯村望華嚴寺不及登亦名
刹也又東爲鴻固原憇宋君別墅即爲李高
士栢所置上有興教寺趙岫遊記云寺直玉

案峰有三塔三藏塔銘唐劉軻撰慈恩塔銘
李弘度撰西明塔銘宋復撰又有呂汲公大
防玉峰軒故址悔不一至也復經杜曲西南
渡瀟水食樊村漢之樊鄉也有鐵狻猊云是
舞陽侯故物登神禾原望終南益近下至皇
甫村觀瀉水水上流爲瀉池合竹谷石豔谷
水益大怒流激石澎湃有聲至香積寺合瀉
入灃以趨渭水矣注所云渭水又東北與瀉
水合又東北經渭城南沈水注之沈即瀉也
再踰神禾原過鄭韓二莊鄭莊相傳是鄭谷

居韓即退之別業宋人詩韓莊連鄭里相望
樹交枝按鄭莊近瓜州村宋張禮遊城南記
濟瀟水涉神禾原西望香積寺下原過瓜州
村注瓜州村與鄭莊近莊處郊居也杜詩今
日南湖采薇蕨何人為覓鄭瓜州自注今鄭
秘監審審虔之姪則鄭莊非谷居明矣志傳
譌也復渡瀟水而東抵牛頭寺已入夜月不
甚明小坐寺前茶話宿方丈

十三日晴循杜陵皇陂東北行再過韋曲去瀟
水漸遠迤邐抵曲江古祠祠荒闕有元延祐

陰符經幢一枚此地即鴻固鳳樓二原之背
曲江久涸麥壠彌望土人指示窪處即曲江
故道原上多明秦邸及士大夫陵冢而芙蓉
園宜春苑紫雲樓諸勝地皆不可考過鄒中

丞蘭谷

應龍

墓墓無片石東為許中丞少華

宗曾

墓華表尚存其北為王冢宰三渠

用賓

墓墓前

石闕極宏麗其裔孫鍾等攜茗具候祠中北
登樂游原背慈恩興善薦福諸寺入永寧門
拜聖廟觀碑林初唐刻十三經闕孟子七
篇曲沃賈中丞

漢復

始補刻之淳化閣帖亦在

焉蘭州徽府本乃木刻此石刻漢唐人名碑
甚夥惟虞永興廟堂記歐陽信本皇甫麻君
二碑對峙大成殿堦下其南有石幢一枚石
理頗龕週遭皆唐人題名如裴行儉杜黃裳
賈至崔顥錢起李舟杜亞呂溫之流悉載自
唐初洎中晚時代不一不知何謂也謁董仲
舒祠祠為前西安太守董君重建甚雅潔冢
在祠後所謂下馬陵也抵寓館日已晡得門
人宜君令范璐書

十四日晴薦福寺僧來云終南有仙人其姓王

近二百歲數年前有見之者

十五日晴年家子華州同知毛士儲寄東雲雜

陰華山經文甚奇有王承之季安序亦鈎棘
不易上口晚寄家書

十六日晴讀張商英護法論其二云文章蓋世止

是虛名勢望驚天但增業習似矣而商英立

朝翻覆乃至請剖司馬溫文正公之棺悅禪

師嘗問其故答云少時只是抵死要官做此

語千載令人齒冷何言行相悖之甚耶商英

又謂今之浮屠凡聖同居魚龍混雜披師子

皮作野干行斯語殆其自贊耶吾不解商英
所學何佛所護何法而虞道園宋潛溪皆序
之略無貶詞何也

十七日晴寄門人麟遊今周鶴書

十八日晴萬壽節晨起望闕叩頭慶賀禮畢

搨工送碑刻至留二十二種道山清話云天
聖詔營浮圖姜遵在永興毀漢唐碑以代甄
甃有一縣尉投書具言不可遵怒按罷之自
是無敢言者後韓縝修灞橋督工急民磨碑
石以應之志云長安古碑遭此二厄存者遂

少然不知五代劉鄩守長安取古碑以甃城
又前此矣古物之存于今者類有神靈呵護
識者所當寶惜也得幔亭弟京師家書

十九日晴甚暑牛頭寺陸居士來杭人

二十日晴發西安府巡撫中丞藩臬諸公送五

里外漢中藩郡丞雲桂門人守備李國祥以中

丞命從行渡豐水有橋梁舟渡渭水抵咸陽

縣關中八水灞滻涇渭豐高澇瀆咸陽有其

四曰涇渭曰豐澇豐澇皆出終南山中北流
入渭獨涇水出筭頭山流經咸陽北畢原即

畢郢原也注云渭水又逕平阿侯王譚墓前
涇水注之漉漉灞澹亦出終南在長安咸寧
二縣界唐曰萬年入渭渭納七水至華陰入河故
入河止稱渭汭也縣中有文武成康廟又有
張桓侯祠祀為水神不詳所始行五十里
二十一日晴過馬跑泉泉深碧可畝許惜在周
行無竹樹亭榭之觀經漢武帝茂陵李夫人
冢在陵西北數步謂之萊陵漢諸陵皆在咸
陽惟茂陵在槐里不載祀典武帝雄猜使鉤
弋無罪不得其死獨惓惓于李氏作為詩歌

播諸樂府死猶祔葬女寵亦有幸不幸焉夫
興平縣漢茂陵縣也晚抵馬嵬驛明正德間
逆閹劉瑾本淡姓馬嵬南八里王舖人瑾盛
時有司建祠其鄉今為墟行八十里

二十二日陰大風過太真墓陸縣丞弘承從行
出壬子歲馬嵬懷古二詩示之陸請刻石墓
旁食武功縣自武功至扶風高岍深谷屢有
登頓即三時原也三時者好時密時廊時也
抵扶風縣鳳翔府境城南瀕漳水水南飛鳳
山上有天和寺東坡先生詩所謂遠望若可

愛朱闌碧瓦溝聊為一駐足且慰百迴頭是
也騎而渡河拾級上徑頗險仄寺廢嘉靖中
移馬伏波祠于寺址稍北為三班祠又北為
文昌祠棟宇傾圮簷下有仆碑拂拭視之即
坡詩也自署癸卯九月十六日挈家來遊後
有跋云天和寺在扶風之南山東坡蘇公留
詩于壁迄今二十年矣予承乏斯邑暇日與
絳臺田愿子立洛陽趙印勝翁同觀愛其真
墨之妙慮久而漫滅乃就樵于石元豐癸亥
六月廿三日終南陳雄武仲碑石堅緻首尾

完好亟語孔今

元祚

移植伏波祠山上故有遠

愛亭取坡詩為名陳文岡

棊

易名愛蘇今亦

廢縣北二十里漢美陽縣故城有法門寺唐
元和十四年迎佛骨于此土人建祠祀韓文
公行一百二十里

二十三日夜雨達旦冒雨行歷龍尾三溝甚苦
泥淖雨後西北望岐山佛螺帝青近在眉睫
北有五將山苻堅為姚萇所困處食義店鳳
翔許太守嗣來迎抵岐山縣約以明日謁周
文公廟行六十里

二十四日辰微雨岐山西北行數里入山煙村
映帶微雨霖霖良苗懷新十里至周公廟廟
門娑羅樹二松樹三皆大逾數十圍入門有
白楊一亦千年物意即蘇公所咏也長楸夾
道爛熳作花入二重門古木蔭砌皆娑羅松
栢楸樹之屬殿前松一娑羅一各高十餘丈
大稱是謁元聖像左右夾室祀召公太公殿
後東北厓上為姜嫄祠厓下方塘潤德泉所
出相傳此泉世治則盈亂則涸唐大中時泉
涌五派守臣崔珙畫圖上進宣宗賜諭褒答

今泉源澄碧出廟流為小溪東西分二支灌
溉甚溥又云邠州亦有一泉此盈則彼涸廟
中石刻蘇公詩金太和七年武義將軍行岐
山縣尉權縣事張忠弼置又一碑並勒韓蘇
二公詩明刻也堦西有元李思齊碑孔克仁
撰文光可以鑑稍南又一碑擊之有聲清越
元少中大夫翰林侍講學士暢師文撰文集
賢學士嘉議大夫太子右諭德蕭顛篆男恭
書書八分甚工按五代以來翰林結銜階在
官下此獨在上與集賢異碑之側有題名云

至治元禩夏五月朔京兆維棧南鄭韓汝楫
曲岐程文饒欽謁祠下長安韓有鄰分書沿
西溪望南山雲氣如曾冰積雪如海濤凸凹
起伏亦竒觀也行十里次橫水鎮水出陽山
酈注之杜水也亦名大橫水抵鳳翔府鳳翔
縣治督學副使武君貞菴事之來迎設宴東湖
湖在郡城東隅僅三畝許得雨益清瀏水亭
曰宛在其北堂三楹曰喜雨亭有康熙中通
判韓北城重刻喜雨亭記碑後為蘇公祠萬
曆中僉事張應福于湖南作君子亭亭下有

蓮三畝竹萬竿是所自為記中按坡在杭在
潁在惠皆有西湖故當時或獻詩曰我公所
至有西湖惟岐稱東湖駐使院

二十五日早晴訪秦穆公墓墓在城中東南隅
巳犁為田三輔黃圖云穆公冢在橐泉宮祈
斗觀下坡詩橐泉在城東墓在城中無百步
乃知昔未有此城秦人以泉識公墓今橐泉
亦不知所在惟嘉靖一碑僉事任惟賢撰文
尚存午微雨諸君復邀遊東湖暮歸

二十六日陰過靈山上有靈鷲寺不登抵汧陽

縣漢隃糜縣也隃糜澤名也產石墨漢尚書
令僕丞郎月給隃糜墨二枚即此汧有石魚
娘子廟具牲醴虔禱拾澗中石礮之輒得魚
鱗鬣宛然行五十里

二十七日微雨汧陽西南涉汧水竟日山行食
縣頭鎮屬隴州古吳山縣地即隃糜也元今
丁帶有吳山十詩殊似姚武功而人罕知之
鎮下有一水出吳山北流入汧即金陵河也
是日陰雨既抵吳山神廟雲氣解駁五峰畢
出行九十里

二十八日昧爽入西鎮廟即事陪祭官鳳翔府
知府許嗣國隴州知州王鶴鳳翔縣知縣王
嘉孝麟遊縣知縣周鶴汧陽縣知縣韋聖翊
亦至奠獻如禮是日大晴霽衆咸異之食畢
登吳山王鶴周鶴李國祥從西過會仙宮一
水自山麓下入溪澗潺湲有聲注云汧水東
會一水發南山西側俗以此山為吳山三峰
霞舉疊秀雲天崩巒傾返山頂相捍暉有落
勢地里志曰吳山古汧山也山下石穴廣四
尺高七尺水溢石空懸波側注湍湊激蕩非

流注汧即是水也稍上里許有坊曰乾坤奧
區過此石壁對起徑漸狹行草樹蒙翳中十
餘折石磴亦漸高如此又數折至靈應峰下
石壁千尋下垂如厂作赭白色石竇如蜜脾
泉源競瀉散流石上若歎珠玉布茵其側取
水試所攜武夷茶徘徊不能去絕壁鑿古篆
晴巖飛雨四大字泉上有漱玉亭廢址所謂
西鎮靈秋也自此而上磴益峻兜子不能造
遂下沿金陵水次隄糜舊縣食罷山行暮抵
汧陽

二十九日晴發汧陽郭外引泂水灌注多種稻
東南行十五里至歸家峽登靈山山乏石乏
水亦無林木然大坂橫絕高處可西見吳嶽
東見太白北見岐梁南見陳倉登降十餘里
始達東峰淨慧寺唐建也有兩院北院頗有
雜樹殿宇華整食藥師殿觀馬光祿谿田理
碑循東麓而下坡陀坦夷二里已及山趾又
十里過唐村通靈寺觀性空禪師牧牛圖十
偈碑禪師鳳翔人雲棲蓮池大師曾和十偈
流通之晡抵鳳翔府行六十里

四月初一日丙戌晴至普門寺訪吳道子畫無
知者觀囁憨禪師長生語錄石刻歸過東湖
謁東坡祠祠外一碑石理麓踈字頗漫漶諦
視即坡詩明太宰滁州胡公松光祿卿臨胸
馮公惟官監司時所刻也自西堤步至水南
來蘇亭本君子亭故址前提學許僉事生洲
孫荃所更名久之復自東堤至水亭茶話晚入
城是日買得梵網經

初二日晴得東坡開元寺憶子由詩搨本又通
判解有東坡梅竹乃俗筆偽作而流俗信之

全載之圖經可笑

初三日晴過西號古城陳倉古城祀雞臺即秦
之陳寶祠也涉汧水過蟠龍山故相國少傅
黨公崇居此涉金陵水抵寶雞縣縣治在陵
原上市高干堞渭水遶其南汧與金陵二水
南北異流相去二十里至寶雞東南皆入于
渭而酈注以一水即金陵水自吳山北流合汧在隄
糜縣古城之西非也門人李守戎國祥明日
歸西安

初四日陰雨渡渭入棧過二里關關隘險阻蛇

徑縈迴峻阪上下數里食觀音堂訪壬子歲
舊宿處已無一僧惟佛殿後石壁如故壁下
一泉泓然修竹亦不復存徘徊久之乃去登
煎茶坪雨作登頓十五里乃就平陸過東河
驛不留又三十里雨止宿黃牛堡漢中府鳳
縣境行一百里

初五日雨過青峰閣白水江源出其下西流入
兩當食草涼驛傳為唐明皇駐蹕之地過北
星長橋登五星臺高際天外下蟠地底箐林
黝窈不寒而慄曹孟德謂為天獄良然哉暮

宿鳳縣行一百十里

初六日夜雨晨陰過鳳嶺上下三十五里驟寒
下山食新紅舖午晴新紅而西歷三岔驛廢
丘關皆夷塗人家陶瓦作屋稍成聚落三岔
之東瀕溪金絲柳一株是百年物長條拂水
婀娜可愛昔傳鳳州三絕手柳酒宋元豐中
詔貢百株植禁中予舊有和門人陳子文奕
禧絕句云鳳州三絕無纖手又少旗亭酒共
傾惟有金絲幾株柳臨江映驛拂人行宿南
星行九十里

初七日晴食松林驛度柴關嶺嶺上下大木千
章尤多漆樹居人取漆必先祭于漆神祠下
嶺即古陳倉道過紫栢山留侯祠相傳辟穀
處并祀黃石公赤松子祠中有趙文肅公貞吉
歸山詩碑臨海王恒叔性士和作刻碑陰紫栢
山巔有古刹峨嵋一老禪獨居數十載蛇虎
馴伏今九十有六矣惜不得其名燈下作頌
古十絕句寄之紫栢以南石壁絕奇至小留
壩兩壁夾澗徑忽斷絕從壁下徐得一徑如
綫乃復通人宿留壩驛行九十里

初八日晴度畫巒青羊二關羣木陰慘陽景罕
曜四月著裘帽寒砭肌骨至青龍寺南方就
夷塗又度虎頭界牌二關關南北石壁連屬
數百丈悉如人家園林巧匠所營下臨黑龍
江映帶如畫棧中石壁當以此地及紫栢山
南為最又下武關名陔志作武休關渡河宿馬道驛褒
城縣境行九十里

初九日過仙人關食青橋驛又二十里夾江兩
岸石色如鐵壁立千仞時有大石抵牾橫道
如巨丈夫頽冠落珮兩山忽合疑若無路從

石罅螺旋而下有橋跨水纔通人騎過橋石
壁益險怪略如蘭相如持璧睨柱髮盡上指
又如樊將軍擁盾裂眦拔刀割彘肩憤怒鬱
勃不可殫形予意必觀音礪本名閭王礪也問之果
然燕子礪險亦如之遂登七盤嶺每盤斗折
而上漸入天際下臨江水數百丈令人掉慄
不已嶺下江岬有石傳是鄭子真釣臺臺側
有白石盆似玉刻字剝蝕不可讀下嶺過褒
城縣渡褒水即褒谷之口也宿河東張太學
蘭若庭前有桂樹三梔子黃楊各一行九十

里

初十日晴抵漢中府南鄭縣駐使院在故瑞邸
之東壬子歲過之邸已改興元書院猶存桂
樹黃甘紫荊數十株今不可識其處矣行四
十里

十一日晴漢中陳太守

邦器

招遊漢臺臺上四望

皆雲山登覽最曠桂樹多至數十本守堂前
有石鼓云是漢時物高二尺六寸圍八尺脰
間作四獸面璞石有剖露痕審視真碧玉也
陳子文益州于役記云制似壘不知何所用

之

十二日微雨泛漢江河合褒水至此為漢江流
空濶遠山屏列一葦中汎清吹間作漁舟四
五用白獺捕魚捷如猿猴頃刻得魚四五枚
大皆數尺斜風細雨極江山杳靄之趣歸徑
諸葛忠武侯祠

十三日晴暑發南鄭之河一涉褒再涉沔過長
寨訪虛谷菴菴中千枝黃楊僅存其一益鬱
茂其東別植桂樹一本今亦十年勢足相匹
詢老道士李陽初久化去今德佑者其徒也

頗知醫食黃沙驛過舊州舖其南三里沔陽
故城漢昭烈皇帝為漢中王築壇即位于此
謁漢威侯馬孟起祠墓祠圯方改作西即忠
武侯祠謁祠下觀唐貞元沈迥碑尚無恙內
江趙文肅貞吉碑已仆語縣尉植之又得南充
陳文端以勤詩碣于壁二公皆蜀人暮抵沔縣
宿東關行一百十里

十四日晴沔縣西多土硯鮮嘉樹非棧中比渡
沮口食蔡壩午後雷雨尋霽此今年聞雷之
始抵大安驛古三泉縣也其東有泉三問之

土人久涸其南五里龍門山宋蘇元老有記
刻石行九十里

十五日晴過蟠冢山涉漾水食寬川舖入五丁
峽峽水甚壯雖入漾而勢足併吞之峽口左
右石壁獐怪狀若鬼神水流其下巨石縱橫
鱗甲飛動水上馬蹄皆脫自北棧來惟觀音
礪險怪相埒然彼行棧上此行水中艱危不
啻過之十五里五丁關關西下水石竹木險
仄蒙密是日晴霽不見曦景自沔以西水無
橋梁亂流二十餘渡過松林驛抵寧羗州州

城廢虎晝入市行九十里

十六日晴州西南一水屈曲北流入漢曰洄水
凡數十渡食黃壩驛一水南流入廣元曰潛
水禹貢沱潛既道酈注引鄭康成曰漢別爲
潛即此水也漢謂西漢也門人陝西驛傳道
程僉事天石兆麟遣使送至蜀界歸西安歷百
牢關閔家坡七盤關皆險峻宿轉頭店四川
保寧府廣元縣境行八十里

十七日食神宣驛即諸葛忠武侯籌筆驛也題
一詩上龍門閣松栝皆參天潛水流經洞門

灘石拒之有聲甚厲梁州記所云葱嶺山有石穴高數十丈號為龍門者也下山十五里宿朝天鎮潛水入嘉陵江處行六十里

十八日晴登舟出朝天峽或云峽上有籌筆驛故址過飛仙閣閣在山椒相傳徐佐卿化鶴跼泊之地又十五里千佛巘鑿石為慈氏像多至百千萬億唐蘇許公頰有利州佛龕記食廣元縣又西皇澤寺有武則天像張郎中應見過舟中舊屬也抵昭化縣無城郭館舍薇宿鄉人孔令毓見野亭言此地有四季蘭不

減建產水行一百二十里

十九日晴昭化南里許登牛頭山山下皆土阜陂陀而上西俯嘉陵江數折不復見江江水西南趨閬中也每折愈高石梯斗絕約二十里始造其巔竒壁修林略如北棧南下斗絕亦如之已及深谷更陟一峰石梯斗絕如前人馬仰天脅息如是陟五六峰四顧羣山皆在其下猿鳥磧絕風雲通之仰視白日如可手捫高埒鳳嶺而險峭什倍其山皆橡林鮮他樹過誌公寺古壽聖寺也陸務觀云劍門

東石壁間影有若僧負杖者杖端彷彿有拂
子刀尺之狀故又稱誌公也披榛訪之基址
頗洪敞惟一石爐及斷闕石欄蕪沒草中餘
無所覩大劍山亦曰梁山石壁麤醜草木蒼
蕪僅通人跡兩壁如頑鐵狀類崇墉劍門呀
然中開張載所銘一人荷戟萬夫趨趨者也
東壁一山削成四方望若堅壘即贊皇所銘
翠壁中橫黯然黛色者矣入關石益僻途益
狹草木益幽翳令人魄悸是日所經率多險
絕行八十里實百二十餘里

自牛頭山以下皆壬
子舊遊所未經歷

二十日陰劍關以南古栢夾道如龍蟠兩巨石
對峙曰石洞子巖厓峭仄緣石磴屈曲而上
五六折乃造其巔食罷三十里達劍州州東
南一里鶴鳴山有顏魯公書元結大唐中興
頌李商隱重陽亭記行六十里

二十一日陰劍州城西皆土阜戴石路尤詰曲
登頓甚苦其坦夷處亦多古栢過柳池故兵
部尚書恭襄趙公炳然墓抵武連驛武連故縣
也本名武功冒雨遊北山覺苑寺有宋元豐
五年敕牒御史盧雖八分書碣觀顏魯公道

遙樓大字碑又有種松碑宋慶元丁巳武連
今青城何琰刻郭璞識也碑陰有元至正魏
公書院記泰定間改武連縣于潼津以此爲
唐魏文貞公所生之地改舊儒學爲書院祀
之又有宋紹興庚申助修新學進士題名碑
馮翊楊師雄書數碑皆爲獻賊鏟去年號獨
紹興字存佛殿畫壁金碧如新南壁有知進
字月空禪師像自題偈云這漢郎當出醜終世談
空說有人求佛祖玄機也解指榆道柳此事
畢竟如何對衆常伸兩手師永樂間人夜雨

夢故修撰蔣先生虎臣顧予微笑予壬子
入蜀先生在峨嶺有寄予兄弟書是歲示寂
距今二十五年忽見夢異哉行八十里

二十二日雨行砵阜上登頓如前未及鳳嶺牛
頭之半而雲雨已在其下人行雲氣中濛濛
沾衣四十里食上亭舖古名郎當驛明皇入
蜀雨中于此聞鈴聲問黃旛綽鈴語云何對
曰似謂三郎郎當因今樂工張野狐製雨淋
鈴曲唐詩雨淋鈴夜却歸秦猶聽張徽一曲
新是也知縣門人李登瀛至二十里七曲山

謁文昌宮甚壯麗登百尺樓觀盤陀石八卦
望水二亭潼水經其下流入鹽亭射洪上有
二栢傳是晉物下山過劍泉泉出石壁下其
上祠觀音大士俗稱水觀音十里有石表曰
送險亭蜀棧之險至此始盡門人通判陳祥
裔守備季咸瑛自成都至抵梓潼縣行八十
里

二十三日晴暑早渡潼水望長卿山相傳司馬
相如讀書處明皇幸蜀過之賜今名李義山
詩梓潼不見馬相如更欲南行問酒壚山下

有漢李業石闕業字巨游不仕莽世錡為公
孫述劫之仰藥死漢書在獨行傳三十里食
石牛舖又三十里抵魏城驛故後魏魏城縣
唐鹽泉縣也有鹽井今屬縣州州守門人李
萃秀至行七十里

二十四日晴食沈香舖門人劉侍御修賢至侍
御子壬子所取士安縣人僑寓縣州下富樂
山舟渡涪江涪水自龍安來經縣州城西東
南與安昌水合滙于芙蓉溪宛成巴字流入
潼川州古梓州界康熙三十一年涪漲潰入北城

公私廬舍皆泯沒今州治移西南版築方始
予暫託宿焉州有思賢堂在舊治東祀楊雄
李白杜甫樊宗師蘇易簡歐陽修司馬光蘇
軾黃庭堅九人又有六一堂宋歐陽觀為推
官文忠實生于此城東有漁父村相傳涪翁
故居也州守以其尊人太常公殉節錄相示
諱興元官雲南按察使吳逆脅
降不屈死事聞贈太常寺卿 行六十里

二十五日夜微雨晨霽沿安昌水行食皂角舖
有水田午後大風過古潺亭涉潺水

俗曰涼
水河 水

下入于涪里許抵羅江廢縣縣省入德陽今

為驛縣西南有大霍山真誥云大霍洞中有
五色隱芝南真及司命所居之地行八十里
二十六日夜雨晨霽登落鳳坡上有諸葛公龐
靖侯祠祠燬于獻賊惟祠門石後狻尚存其
一有碑題漢龍鳳二公祠東鹿頭關即士元
墓杜詩所謂鹿頭何亭亭者也地多鸚鵡食
孟店涉縣堰水水出縣竹入中江抵德陽縣
行五十里

二十七日晴涉石亭水沈水鴈水食漢州西南
涉石梯水彌牟水房次律西湖在城西隅湖

自宋熙寧間奏墾為田遂廢房公彈琴處舊
有竹亭李衛公劉賓客賦詩憑弔之地不可
識矣彌牟鎮今名唐家寺路側迤東有八陣
圖遺跡又南過漢兗州刺史雒陽令王君稚
子雙闕其一又題侍御史河內縣令樂府鴈
門太守行孝和帝在時洛陽令王君本自益
州廣漢蜀民又云從溫補洛陽令即此而題
鴈門太守未詳吳競作樂府解題亦嘗疑之
抵新都縣提督四川吳公英遣守備劉應瑄
來迓夜雨行一百里

二十八日雨稍霽過楊文忠公

墓升菴榭焉

渡錦水大小毘橋二水水濱夾道皆竹園食
天迴鎮成都縣境明皇幸蜀返蹕駐此因名
圖經云有天迴山實無山也過昇仙橋巡撫
四川副都御史于養志提督總兵官吳英布
政使高起龍按察使祖文明分巡建昌道僉
事李毓柱成都府知府張文燦敘州府知府
譚日章等迎拜起居如儀入城駐使館諸公
來行五十里予去成都二十有五年今再至
人民廛市殊倍于昔既庶則富之既富則教

之惟守土者加意云

二十九日夜雨晨止昧爽詣江瀆廟即事陪祭
官四川布政使高起龍成都府知府張文燦
奠獻禮畢周視殿宇神像是一年少金冠束
髮似世俗所謂灌口二郎者左右二神女皆
南向不知所指又云神是三閭大夫尤不經
按成都故有神禹祠又有秦守李冰祠當稽
舊蹟釐正之

三十日晴

秦蜀驛程後記卷上

